

W 438
2. D. B. V.

XXIX.
34351

DISSERTATIO MEDICA INAUGURALIS
DE

GENTIANA

QVAM

RECTORE MAGNIFICENTISSIMO

SERENISSIMO PRINCIPE AC DOMINO

DOMINO

VVILHELMO HEINRICO

DVCE SAXONIÆ IVLIACI CLIVIÆ MONTIVM
ANGARIÆ WESTPHALIÆ ET RELIQUA

PRAESIDE

IO. HADRIANO SLEVOGTIO

M. D. ET P. P.

PATRONO PRÆCEPTORE AC PROMOTORE SVO
VENERANDO

PRO DOCTORIS GRADV

INSIGNIBVS AC PRIVILEGIIS

MORE MAIORVM RITE CONSEQVENDIS

PVBLCÆ PHILIATRORVM DISQVISITIONI SVBMITTIT

IOANNES ANDREAS Weber,

MARIO-INSVLANVS PRVSSVS.

D. VIII JANVARIII M DCC XX.

IENAE

LITERIS VVERTHERIANIS.

Pro: fecit Pro: de Bandura Ceylonensis.

LXII.

4 1/2 pl

PERILLVSTRI GENEROSISSIMO ATQVE EXCEL-
LENTISSIMO DOMINO

D O M I N O

CAROLO HENRICO

SACR. ROM. IMPERII DAPIFERO HAEREDITARIO,
ET COMITI

DE WALDBVRG,

SACR. REG. MAJEST. IN PRVSSIA COMMISSA-
RIATVS PRVSSICI PRAESIDI, AC CA-
MERARIO ORDINARIO,

DOMINO HAEREDITARIO TERRARVM
Litschen/ Schrammen/ &c. &c.

SVMMO LITERARVM PATRONO
ET MAECENATI SVO
GRATIOSISSIMO,

Differtationem hanc inauguralem in perpetuum hu-
millimæ submissionis monumentum, sui studio-
rumque suorum qualemcunque commendatio-
nem, cum pio omnigenæ felicitatis, ac perennan-
tis prosperitatis voto,

*submissa animi devotione consecrat
servus obsequiosissimus*

JOANNES ANDREAS Weber.



J. N. J.

§ I.



ENTIANA, inquit Dioscorides, lib. 3, cap. 3, *a Gentide*, quem Plinius, Hist. nat. lib. 25, cap. 7, Gentium vocat, Illyriorum Rege, *primum inventa esse creditur, a quo etiam nomen habet*: quod non ita intelligendum est, eam, tanquam raram plantam, ab ipso primum observatam esse, cum, Plinio teste, ubique nascatur, in Illyrico tamen præstantissima sit; sed quod ejus usum, inprimis in peste, per experimenta cognitum, populo commendaverit; ut proinde Serapioni Basilica vocata sit. Græcis sonat *γεντιάνη* & *γεντιάνη*, quam Narcen & Chironiam olim vocatam esse, post Hieron. Tragum, Jo. Bodæus a Stapel, in commentario in lib. 9, cap. 8, Historiæ plantarum Theophrasti Eresii, pag. 1044, scribit: cum hæc nomina alias centaureo majori tributa fuerint. Inter synonyma, a Jano Cornario,

A

ex

ex textu Dioscoridis, ad finem operis reposita, præter jam adducta, etiam cicendiæ, & ciminalis herbæ vocabula extant. Germanis, latinam & græcam vocem corrumpentibus, est *Enzian* & *Enzig*/ a sapore vero *Bitter-Wurk*; ad quem illi etiam respexerunt, quibus ea aloë Gallica, & Dardanis aloëtis audit.

§ 2.

Cum Dioscorides, Plinius, Galenus, & reliqui antiqui, unius saltem gentianæ mentionem fecerint, crevit postmodum numerus per industriam recentiorum. Ex quibus modo laudatus Stapelius, quamvis in Theophrasti textu, loc. cit. nullam gentianæ mentionem offenderet, noluit tamen nobilem plantam silentio præterire, duasque icones, unam *majoris* officinalis, *flore luteo*, a Dioscoride descriptæ; alteram *minoris*, quam Tragus, Gesnerus, Fuchsius, & C. Bauhinus *cruciatam* vocant, commentario inseruit. Hisce duabus tertiam Petrus Matthiolus, in comment. ad lib. 3, cap. 3. Dioscoridis addidit, quæ a C. B. *gentiana palastris angustifolia*, a Lugdunensibus, Dodonæo, Gesnero, *calatbiana viola*, a Theodoro vero, in loco, a Gentianis remoto, post Lobelium, *pnevmonantbe* salutatur. Matthiolo est hæc inter gentianas *minima*, & species cruciatæ minor statuitur: haud firmiori fundamento, quam quando eam ab Ananiensibus rusticis *petinbrosam* vocatam, *metinbrosam* potius salutandam esse scribit; quod, ob virtutes suas antiloimicas & anthelminticas, semper in bursa vel crumena gestari debeat, inque Medicorum, eandem præscribentium, crumenas multum auri & argenti mittat.

§ 3.

C. Bauhinus, cum, anno 1598, commentarium Matthioli in Dioscoridem, synonymis auctum ederet, ternario memorato iconum gentianarum *quartam fl. rubro* junxit, eique secundum a majore fl. luteo locum concessit: ut proinde mirum videatur, cur non etiam illius aut albifloræ, cum Theodori Tabernæmontani Herbarium, anno 1613, itidem synonymis, & adjectis herbis, earumque virtutibus illustraret, mentionem fecerit: cum tamen non inutile fuisset, septem illas gentianas, a Theodoro in tam diversa capita, 13 scil. 14 & 8 dispersas, iterum colligere, & ex ipso Phythopinace, dudum anno 1596 edito, & 18 species comprehendente, eorum numerum amplificare: ne hic Autor Chabræo, 12 figuras, ex J. Bauhini Hist. univ. plant. mutuatas, exhibenti, inferior mansisset.

§ 4.

Larga itaque messis fratribus Bauhinis cessit, quorum labores Tournefortius in suos usus vertens, ex modo citata Joannis Historia, & Caspari Pinace Theatri botanici, 21 species recitante, in Elementa botanices 11, in Institutiones autem 19 nomina, cum synonymis, ex Dodonæo, Clusio, Fab, Columna & Tabernæmontano petitis, transtulit, quibus non solum ex Ravi Historiæ plantarum tom. 1, lib. 15, sect. 1, cap. 3, pag. 721, *Gentianella Indica* Bontii, & *Bandura* Cingalantium, sed etiam ex tomo 3 Histor. qui primi atque secundi supplementum est, ejusque lib. 15, cap. 3, pag. 360 & seqq. ex Pluckenetti Phytographia, & Mantissa Almagesti, nec non ex Morissonii Tabulis, nondum editis, & Petiverii actis Philosoph. Londin. Clusio item, Parckinsonio,

Bocconisque Museo rariorum plant. atque Horto Malabarico, & Muntingii Herbario Belgico, 6 gentianæ, & 12 vel 13 gentianellæ, ex Alpibus, Æthiopia, America, Marylandia, Virginiaque collectæ, nec non aliæ, e.g. Gentiana Hydropica &c. addi possent, modo omnes genuinis distinctionis notis signatæ essent: quas, ut nunc constituamus, potissimum laborabimus.

§ 5.

Posuerat equidem Rajus, loc. cit. *folia nervosa, in caulibus ex adverso bina, flores calathoides, margine in lacini-
as aliquot, totidem folia* (petala intelligit) *imitantes, plerum-
que diviso, & saporem amarum*, ceu genericas cognitionis notas: sed reprehenditur a Tournefortio, pag. 96, Elem. botan. cui haud difficile videtur, gentianam *foliis alter-
natim positis, & nequaquam nervosis, saporeque dulci* præ-
ditam concipere. Verum, quamvis negari nequeat, neque *locum*, aut *figuram foliorum*, neque etiam eorum *saporem* aut *colorem*, similesque qualitates, promiscue constans inter vegetabilia discrimen formare, sed hoc a *fructificatione*, ut vocant, nempe a *flore & semine*, horumque *figura*, *numero* ac *situ* potius in plerisque petendum esse: neuti-
quam tamen hujusmodi notæ plane contemnendæ sunt: cum, ipso Tournefortio fatente, gentianis haud florentibus cognoscendis inserviant; tales vero plantæ, quales ille dari posse fingit, nondum alicubi inveniantur, prætereaque ipsi inusitatum non sit, quasdam plantas non æque per *solos flores* & *fructus*, sed etiam per *radicum & caulium* structuram, *fo-
liorumque & florum figuram & colorem, situmque* discernere. Sic, ut ex multis exemplis pauca referamus, ad accuratam sui,
sifari,

sisari, bulbocastani, & tragoselini dignotionem, non tantum flores & semina, sed insuper *radices* eorum; in dente leonis & hieracio *caules*; in absinthio, abrotano, artemisia, matricaria, chamæmelo, cotula, bupthialmo, millefolio, ptarmica, foeniculo, & meo &c. *foliorum figuram*; in chrysanthemo & leucanthemo *colorem florum* respicere jubet; cum in hisce & multis aliis vix sufficientia ex consuetis characteris partibus signa diagnostica habeantur.

§ 6.

Id igitur potius tanti Botanici *εργον* fuisset, characterem, omnibus gentianis adaptandum, invenire; quodsi vero impossibile fuisset, tam distinctas figuras florum atque seminum sub unum genus cogere, potuisset certe, quod passim alibi facere consuevit, heteroclitas, & a formato characterē recedentes, ad alia genera ablegare, aut etiam prorsus *nova nomina* iisdem excogitare: cum, verbis R. ji. Meth. plant. emend. & auct. pag. 81, *novorum nominum parvus non sit*; nosque persuasi simus, talem licentiam Botanicos eadem animi æquitate toleraturos fuisse, qua permiserunt, violam indicam scandentem Horti Paris. & utriusque Bauhini ab ipso *Cardaminum*, pisumque vesicarium, post J. B. *Corindum*, solanumque racenos, Indic. H. R. *Phytolaccam*, & panacem racenos. Cornuti *Araliam* salutaris, nec non in Corollario institit: novis generibus plantarum, ab ipso conditis, *Phelyppæa*, *Dodartia*, *Morina*, *Gundelia*, *Elephantis* nomina, nunquam antea audita, imponi.

§ 7.

Cum igitur a Rajo, ejusque sectatoribus constructus character minus sufficiens habeatur, nec hactenus a Bota-

nicis aliis melior excogitatus sit, & is, quem Christophorus Knaut, pag. 7 Enumerationis plant. circa Halam nascentium, habet, quatuor tantum gentianas, patriæ suæ solo indigenas, concernat, imo, si vera fateri volumus, ne his quidem omnibus competat, dum flores *monopetali erecti, cavi, & oblongi*, ibi tanquam essentialia signa gentianarum positi, primæ saltem, secundæ & quartæ speciei, tertiæ autem in ordine, florem quadripartitum, i. e. tetrapetaloidem alenti, minus competat: ideo ex Elementis & Institutionibus Tournefortii sequentem eruemus: *Gentiane flos est simplex, regularis, monopetalus vel campaniformis, in quinque aut sex partes sectus, vel tubulatus diductus, & varie fissus, ex cujus calyce, trans floris fundum, bicornepistillum surgit, quod in fructum membranaceum, unilocularem, ovatum, acuminatum, & in medio paulisper inflatum, ac, per maturitatem, in duas valvas debiscentem abit, in quo multa semina, modo rotunda compressa, & margine membranaceo cincta, modo sine margine, vel rotunda, vel ovalia & striata continentur.*

§ 8.

Vocat Autor florem *monopetalum*, & in Institutionibus quidem, tantum *multifidum*, ut Lector, haud sine tædio, incertus de numero sectionum relinquatur; cum tamen eadem facilitate, qua id in Elementis ut plurimum fecit, statim numerum laciniarum addere, eumque hoc loco *quinarium & senarium* esse, indicasset, vel potius *pentapetalum* aut *hexapetaloidem* eundem appellando, unico vocabulo, floris fundum integrum, reliquam autem ejus laminam, quinquies vel sexies fissam esse docuisset. Cur au-

tem

tem *campaniformem* figuram *quibusdam* floribus tribuat, obscurum est: cum nec in gentiana majori lutea, nec in aliis, *non tubulatis*, quidpiam campanæ simile observetur, sed lacinia potius memoratae, fere ad basin penetrantes, in aëre æstivo liberoque, *stella* instar explicentur, ideoque flos ipse *stellatus* dici mereatur, qualem etiam figuræ a Theodoro, Trago, Lobelio, Chabræo, Moriffone, ipsoque Tournefortio, Tab. 40, depictæ, exhibent.

§ 9.

Circa *receptaculum* seminum non una Autorum sententia est. Quamvis enim nudis oculis *pistillum bicornè*, embryonum, a staminum anthera fœcundandorum, matrem, in tubum membranaceum ventricosum abire, & *simplici cavitate* præditum esse pateat, placuit tamen insignibus Viris contrarium statuere: inter quos Rajus, meth. plant. p. citata, folliculum seminum *bicapsularem* esse statuit; oblitus, in sua Historia I. Bauhinum, Clusium, Columnam, &c. varias gentianarum species describentes, plus *simplici* quidem vice, vasculum illud *bifidum*, *bivalve*, & *in duas æquales partes se aperiens* vocasse, nunquam autem *duas cavitates* ipsi tribuisse. Erroris igitur hujus causam credimus partim defectum autopsiæ, qua semet in multis aliis quoque plantis laborasse, sponte fatetur, partim nimiam autoritatis Hermanni, Cynos. mat. med. Part. I, p. 51, idem asserentis, fiduciam fuisse: ut propterea merito a clarissimo Christiano Knautio emendetur, Meth. plant. genuinæ, pag. 43, ubi Morisson quoque & Bobartus, quasi gentianam plantis multisiliquis accensuerint, notantur.

§ 10.

Post florem & receptaculum seminis, hujus examen quoque suscipiendum est; cum idem non omnibus speciebus ejusdem figuræ contingat. Quamvis enim Tournefort, cum in Elementis id ordinairement aplati & fueilleté, *planum & foliatum* vocasset, in Institutionibus semet ipsum corrigens, illud *plerumque tantum* planum, orbiculare, & marginatum pronunciet, & tale quoque in icone tabulæ 40 repræsentet, & Rajus, loco modo citato, semina in *plerisque* speciebus plana & foliacea appellet: nondum tamen hoc pacto id, quod sensus docent, asseritur: cum non plerumque aut inplerisque, sed vix in quatuor aut quinque gentianis, flores scilicet luteos, purpureos, albos & cœruleos, asclepiadisque folia gerentibus, ejusmodi semen, quod alii *paleaceum & acerosum* vocant, reperiatur, & contra ea reliquæ omnes, quotquot apud Rajum, in primo atque tertio Historiæ tomo, ex utrisque Bauhinis, Clusio, Columna, & aliis, in superioribus nominatis descriptæ leguntur, *gentianarumque & gentianellarum* nomina, sortitæ sunt, semina vel *rotunda globosa*, vel *compressa*, *oblonga* item & *striata*, cuncta *sine margine*, & nulla quoque *pulverulenta*, qualia Morisson, Histor. Oxon. univ. Part. 3, sect. 12, c. 14, p. 481, fingit, post se relinquunt.

§ 11.

Antequam hinc abimus, circa gentianæ majoris, fl. lut. quam, ceu præcipuam hujus generis vegetabilium speciem, Botanici cæteris anteponunt, *semen* levis adhuc scrupulus removendus est. Cum enim hoc Dioscorides *latum*,

leve

leve acerosum esse, & ad sphondylii semen accedere scripserit, hoc vero, more apud umbelliferas herbas recepto, suo gemello sociatum, dorsum pellicula rugosa tectum, eaque demta, superficiem amplam, inæquabilemque, & extrema, in tenuem membranam desinentia, exhibeat, ideo Hieronymus Tragus, Herbarii Sect. I, c. 56, ab hac descriptione recedens, gentianæ semen *parvum, tenue, latum, leucoioque* potius *luteo* simile assignavit, & J. Bauhinum, ut eadem comparatione uteretur, disposuit. Cum autem nonnulla leucoia semina oblonga, & sine margine, alia autem rotunda magis, depressa, & exiguo limbo circumdata obtineant, ideo hæc potissimum indigitari, per adjectum epitheton Tragus significavit.

§ 12.

Ex hætenus allatis patet impossibilitas, manentibus hætenus receptis nominibus, tot herbas, per ea indicatas, & tam manifeste, quoad fructificationem, discrepantes, sub uniformem characterem cogere. Quamvis enim Tournefortio, p. 81 Elementorum, tanquam πρόβλημα, in mentem venerit, *duo* genera hujus vegetabilis sisti *posse*; ut scil. *gentiane* nominentur, quæ florem *campaniformem* (ut ipse vocat) gerunt, *gentianella* autem, in quibus ille *tubulatus* est, talisque dividendi modus a Christiano Knautio, Meth. plant. gen. p. 96, prorsus approbatus sit: mox tamen ab ipso ejus Autore reprobatus, ac proinde nequam in Institutiones receptus est: cum, quod verba Gallici textus, immediate istam propositam divisionem excipientia, indicant, tunc opus esset, species, magnitudine illi communi (fl. luteo, hominis altitudinem attingenti) æquales,

les, inter gentianellas, ceu horum diminutiva ponere, & e. g. plantas, a C. B. gentiana major fl. purpureo, & fl. punctato appellatas, inter gentianellæ species remittere: quod *inconveniens* ut evitetur, necessarium esse, *duas plantarum sortes, parum* (imo multum) *per florum* (& seminum) *forma differentes, uni gentiane characteri includere*: cui necessitati, ne nimis obstinati videamur, nos quoque subscribimus.

§ 13.

Cum autem modo, & alias frequenter distinctionem gentianarum in *maiores* & *minores* nominaverimus, in transitu ad alia monemus, non ex floris *mole*, sed ex *caulis* potius *proceritate*, aut *foliorum amplitudine* magnitudinem æstimandam esse: & proinde, inter tot hætenus cognitæ species, vix quinque aut sex *majorum* cognomentum jure sustinere, reliquas autem omnes *minorum*, i. e. gentianellarum classi inferi; quamvis una vel altera earum, e. g. vernalis gentianella, pusilla herba, flore suo calathino inflatoque, proceros bicubitales & tricubitales superet.

§ 14.

Constituto igitur qualicunque gentianarum character, nunc per eundem præcavere quimus, ne plantis, aliena ab illis facie conspicuis, porro, ut hætenus temere factum est, ipsis minus competens nomen irrogetur, aliisque idem, præter meritum, dudum gerentibus adimatur. Haud amplius igitur radix illa, officinis quibusdam gentiana alba, & nostratibus rhizotomis *weisser Enzig* audiet, quam J. B. libanotidem Theophrasti, & seseli æthiopicum, Matthiolum cervariam albam, celeberrimus Valentini,

Part. 1, Musei museor. c. 39, p. 203, peucedanum Italicum & tandem, post Morissonem, Tournefortius laserpitium foliis latis lobatisque vocant. Quamvis enim nec amaritie gentianæ magnæ, ne usu (quem citatum Museum ipsi plane denegat) in febribus, & ventriculi, hepatis ac uteri morbis egregio cedat, nomen tamen ejus affectare nequit; cum herba sit umbellifera, quæ, post florem pentapetalum, gemella, & in dorso 4 latis alis instructa semina producit. Sic ob floris & seminis discrimen, gentiana folio convoluto Anglica Gerardi, apud Chabræum, p. 503 delineata, ad lychnides, una cum Gentianella larulichroo Fab. Calumnæ a Moriffone, H. B. p. 221, ablegatur. Nec Triange Pusquam, in Horto Malabarico, gentianella foliis trinerviis, flore cœruleo bipartito appellata, hic, ob florem *papilionaceum* & semina nuda, stare potest. De gentianella Alpina minima, pyrolæ folio, dubitat Rajus, cum nec florem nec fructum viderit. De Bandura Cingalensium, inter gentianæ Indicæ species relata, aget D. D. Præses in Pro-
lusione, nostræ Dissertationi præmittenda,

§ 15.

Exclusis h. m. herbis, *falso* gentianarum nomen usurpantibus, *exactior* jam *verarum explicatio* suscipienda esset: verum, cum ea modum speciminis excessura sit, in communi illa majori fl. luteo, ut passim salutatur, ceu, in officinis notiori, præcipue occupabimur; cujus descriptionem, maximam partem ex Dioscoride, hinc & aliis depromptam, dabimus. Radix crassitie sæpe brachium viri, & longitudine duos cubitos æquans, multifida est, grisea, vel rufa, aut fusca cuticula, pro ratione soli, tecta, intus sub-

stantiam flavescentem, pulposam, porosamque, & insigniter amaram sine odore continet, unde caules cubitales, bicubitales, interdum tricubitales, læves, cavi, digitum crassi & geniculis distincti exsurgunt, ex quorum lateribus utrinque folia, sibi opposita, pediculisque subrubris & connatis caules amplectentia, prope radicem multa, deinde, per majora intervalla, pauciora prodeunt, inferius nuci juglandi, aut plantagini, deinde helleboro albo potius similia, sed polita magis & lucida, tribus aut quinque nervis intertexta. Ex horum sinibus, a medio caulis ad ejus apicem, multi calyces, in quinque vel sex apices distincti, & verticillorum more dispositi, nascuntur, in quibus flores lutei, longiusculi, quoad fundum integri, mox in quinque vel sex lacinias profunde dissecti, & in stellæ figuram, cum interpositis totidem staminibus clavatis, sese explicantes continentur, ex quorum bicornibus, & in medio turgidulis pistillis capsula membranæ, ejusdem figuræ, simplici cavitate præditæ, & maturitatis tempore, sponte in duas partes dehiscentes, fiunt, quæ multa semina, leviter rubentia, rotunda, compressa, tenuique margine membranaceo cincta offerunt.

§ 16.

In hac descriptione occurrit circa *folia* dissensus autorum, cum in quibusdam codicibus Dioscoridis τὰ Φύλλα ἐν μέσῳ τῷ καυλῷ, καὶ μάλιστα τὰ κατ' ἄκρον ἐσχισμένα μικρῶς, *folia in medio caule, & maxime circa summum leviter fissa*: in aliis autem ἐπισχισμένα μικρῶς, *longe & prolixè in superficie incisa*, legantur, & Cornarius atque Ruellius in suis versionibus hunc quidem textum sequantur, sed eo ipso insignium Botanicorum oculis fidem derogent, qui *nihil*

bil fissi in foliis deprehendentes, nobis in iconibus ista a capite ad calcem *integra* exhibent. Primus, quantum scimus, Bodæus a Stapel, in Comm. ad Theoph. l. c. errorem hunc a doctis viris agnitum, & ita correctum tradit, ut Dioscoridis verba id sonent: καὶ μάλιστα τὰ κατ' ἄκρον φύλλα μικρότερα, *in superiori caulis parte sita folia sunt minora.* Hinc quando Tragus, l. c. de germinatione gentianæ ita loquitur: Die bletter / so erstmahls auf der erden ausgespreit liegen / vergleichen sich den breitten wegerich / oder den Nußbaum-bletteren. Die runde hohle stengel dringen mit heraus / mit Knöpfen / und kleinen zerkerfften bletlin / &c. cum non nisi de incipientibus verticillis, eosque constituentibus cuspidatis calycibus florum intelligendum esse, ex adjecta icone herbæ patet, in qua infima, media, atque summa folia, absque ulla fissura, una cum floribus stellatis perfectis, imperfectisque verticillis & globulis, a rudi quidem, sed accurata tamen manu sculpta, cernuntur.

§ 17.

Quando porro Dioscorides καρπὸν ἐν κάλυξι, Botanici autem eum in *capsula* recondi tradunt, facile conciliantur. Quamvis enim in pluribus vegetabilibus, e. g. cunctis verticillatis, borragine item, & asperugine, symphytoque &c. semina, præter *calycem*, nullum peculiare receptaculum nanciscantur; ideoque talia inter γυμνόσπερμα, quæ semina *nuda*, exemplo ranunculi, sagittalis, caryophyllatæ, clematidis, umbellarum, &c. nulli capsulæ includunt; & inter ἀγγιόσπερμα, quæ illa more papaveris, leguminum, nasturtii, raparum, &c. vel in capitibus, vel in siliquis, vel in silicu-

lis, vel in vaginis continent, medium locum obtineant; rectius tamen gentiana *vasculosa* judicatur, cum ejus semen non immediate a calyce, sed mediante capsula, ex pistillo profecta, ab eo custodiatur.

§ 18.

Locum natalem Dioscorides montium cacumina constituit, eaque non aperta & sicca, sed *umbrosa & aquosa* intelligit, ubi radix sufficientem succum invenit, ut ipsa brachii crassitiem, & herba trium ulnarum altitudinem acquirat. Laudat Matthiolus in excelsis Tridentinis montibus, præsertim in Ananiis, prata & pascua. Tragus nominat in Germania Sylvam nigram, Stiriam item, ac Austriam, ubi inter filices frequens reperitur. Post J. Bauhinum, Rajus in Alpium & Genevæ montosis pascuis copiosam vidit. Hungaria profert sæpissime florem purpureum, Stiria album, nec Norvvegiam ea carere, testis est S. Pauli, in Quadrip. bot. Tempus florendi ordinarium in frigidiori climate est Junius & Julius, ut semen in Augusto maturetur; in calidiori autem regione jam medio Majo flores explicantur. Postquam autem finem, cunctis vegetabilibus a natura assignatum, scil. fructificationem absolvit, tunc commune tot præclaris herbis, v. g. coronæ solis, quam J. B. herbam maximam vocat, phytolacæ Tournef. strammoniis, ricinis, persicariæ magnæ lapathi folio, &c. tot cubitorum proceritatem, amplamque latitudinem unica æstate accipientium, fatum subire cogitur, ut ante hyemis adventum consumatur, radice tamen salva manente, ex qua & semine sequente vere renovatur. Adeo autem amans suæ patriæ est, ut, cum una alterave gentia-

gentianellarum vernalium & autumnalium, in hortos translatarum, spectantium oculos sua pulchritudine delectent, ex majoribus tamen speciebus hæc nostra imprimis, cultum respuat, &, teste Stapelio, l. c. in suo horto, eodem, quo plantata fuit, anno, omni diligentia frustra adhibita, perierit, & quamvis in horto medico Lugdunensi & Mülleri Groningensi aliquando floruerit, elapso triennio tamen interierit.

§ 19.

Cum non nisi radix in officinis expetatur, merito illa, per exsiccationem admodum rugosa facta, qualis plerumque ad nos affertur, repudianda esset: quia tempore minus opportuno, mense scil. Septembri, quem vulgo effossioni destinant, collecta est; antequam in locum succi, per æstatem in plantæ caules, folia & semina magna ex parte impensi, novus successerit; id quod sequente demum vere, quo novelli turiones, ceu reparatarum virium indices, ex terra emicare incipiunt, futurum esse rhizotomi cogitare deberent; quia tunc radicem, quantitate succi & virtutibus autumnalem superantem, invenirent.

§ 20.

Tribuerat Dioscorides gentianæ vires *calefaciendi & adstringendi*, quas nonnulli, ceu ex discrepantibus principiis fluentes qualitates, vix simul in eodem concreto stare posse crediderunt. Cum crassum atque fixum attenuare, & quod adstrictum est, resolvere, inque motum revocare, caloris proprium munus sit: adstringendi facultas autem non minus a frigidis, fluidum coagulantibus, quam a siccis, humi-

humiditatem imbibentibus, expectanda sit. Plerique igitur vel cum Avicenna, radicem calidam in tertio, & siccam in secundo gradu, vel, cum Schroëdero, caliditatem atque siccitatem ejus in secundo gradu subsistere statuunt, eamque fixarum partium sulphurearum, salinarum atque terrearum, quibus amara inodora pollent, beneficio, humores viscidos minusque mobiles fluidos reddere, obstructions meatuum & pororum, jam inde natos, referare, & imminentes præcavere, hinc frigiditatem, solidis inductam, emendare, coctiones viscerum debiles adjuvare, tonumque eorum imminutum roborare, secretionem tardius procedentes promovere, & motum atque calorem vitalem ubique instaurando, stases, putredines & corruptiones, arcere asserunt.

§ 21.

Edere vero solet tot saluberrimos effectus partim *insensibiliter*, & sine manifesto motu, quod *alterare* Medici vocant, partim *evidenter*, naturam excitando, ut ipsa, quod noxium est, ex corpore per cutem, parotides, renes, uterum, intestina & alia consueta insuetaque loca ejiciat; & hac ratione, gentiana non solum, per ablationem superflui humidi, suam *siccandi* vim exerceat, sed simul etiam per laxitatis toni, in viis & visceribus plurimas anomalias, circa coctiones & excretionem, generantis, correctionem ostendat, semet a Dioscoride recte inter *adstringentia* remedia relatum esse.

§ 22.

Ne vero tot reliqua encomia, ipsi attributa, ultra limites potentiae ejus vagari videantur, per testimonia Practico-

eticorum illa asserta confirmabimus. Inter hos Galenus, lib. 6, de Simpl. med. fac. c. 8, ita loquitur: *Gentianæ radix multum est efficax, cum opus est extenuatione, purgatione, abstersione, obstructionis liberatione: nec mirum, si hac possit, cum impense sit amara.* Sed temere hoc loco vim alexipharmacam omisit, quam alius, Galeni nomen præ se ferens, ad Paternianum de simplicibus medicamin. scriptus liber, cap. 121, pag. 320, tom. 8, ita effert: *est radix gustu amarissima, & habet vires acres & excalfactorias & relaxantes, (resolventes) & acrimonia & amaritudine sua potest partum expellere, & omnem serpentem fugare, & adversus venena prodesse.* Uno igitur omnium ore in peste & malignis affectibus præcipuus usus ipsi adscribitur, ut Lobelius eam putredinis (qualem ut plur. animalium venena humoribus inferunt) hostem infensissimum, & veneni mortem, pestisque adeo præsens remedium appellet, ut non modo hominum, sed brutorum etiam incolumitatem tueatur, amissamque reddat, & idpropter in celeberrimas antidotos, Mithridatium Damocratis, Theriacam Andromachi & Diatesaron Mesues, Fracastoriique Diascordium recipiatur.

§ 23.

Ubi tamen monendum videtur, ne uni vel alteri simplici nimium fidentes, titulisque medicamentorum abutentes, Hermannii Cynosuram, pag. citata, ex sola gentiana & melle theriacam conficere præcipientem, audiamus, aut Mesuen, ex aristol. rotundæ, gentianæ, baccar. laur. & myrrhæ æqualibus partibus, cum melle theriacam suam

C

dia-

διατεσσαρων parantem, imitantes, porro circumforaneis occasionem præbeamus, ad Mesues exemplum, Trago teste, baccas lauri, gentianam, aliasque radices, omissa myrrha, cum melle miscendi, credulæque plebi, sub specioso theriacæ nomine obtrudendi. Quamvis enim talismodi pharmaca in febribus & affectibus ventriculi, capitis, uteri &c. justo tempore adhibita, admodum proficua existant, falluntur tamen, qui, cum nomine, se rem ipsam obtinere credunt, aut, Marggravio, Mat. med. contr. Sect. 4, c. 12, non æque contradicente, Mesues diateffaron theriacæ, ab Andromacho denominatæ, *præferre* audent: cum, ut alia ingredientia taceamus, ob solum opium, hæc illi, & isti Agyrtarum in pluribus casibus superior deprehendatur.

§ 24.

Ad serpentum morsus Dioscorides 3ij radices cum pipere, ruta & vino laudat. Serapioni, per experientiam, magna ejus adversus vulnera, a rabido cane inflictæ, efficacia innotuit; quem postmodum alii cum successu secuti sunt. Haud pigebit modum curationis verbis Tragi, orthographiam & elocutionem nostræ linguæ, ante duo sæcula usitatas, repræsentantibus, ex cit. cap. 56, describere: Gedörte Entian-wurzel rein gestossen / und durchgerâden / davon eins quinten schwâr / mit einem quinten Myrrha / und zweien quinten gebranter bach-krebs-aschen / in wein getruncken / vier tag nach einander / ist die best und fürnemst hilf und arznei / denen / so von den rasenden hund seind gebissen. Man soll auch
die

die wunden offen halten / schön waschen mit eßig oder
salz wasser / auch köpfflin darauf gesetzt / das Gift
darmit heraußer zu ziehen. Eetlich lassen den Schaden
mit glüenden eisen brennen.

§ 5.

Propter facultatem resolvendi, haud exiguas quoque
laudes in obstructionibus hepatis, lienis, uterique meretur,
aut ubi a sanguine ex lapsu, contusione, aut ruptione vasis
alicubi stagnante, dolores oriuntur, abscessusque metuendi
sunt. Commendantur tunc ejus pulvis, infusum, deco-
ctum, succusque expressus & per coctionem prolectus. Vo-
cat hunc interpretes Dioscoridis *extractum*, (cum rectius
rob audiret) eumque inprimis pleuriticis commendat.
Paratur ex radicibus, quæ, cum aqua per 5 dies macerata,
postmodum coquuntur, brodiumque frigefactum, ut fæces
fundum petant, & colatum, ad mellis crassitiem, per co-
ctionem spissatur. Eundem Schroëderus a 3ß ad ℥iij cum
successu in febribus intermittentibus dari asserit. Causam
auxilii Hermannus, l. c. amaritiei radicis intensæ, & sali
ejus *fixo rigidoque* adscribit, cujus ope febribus, & ab iis
dependenti ventriculi debilitati proficua evadat. Dolæ-
us æquiparat eam cortici Peruviano, secutus Danieleni
Ludovici, qui Pharm. mod. sæc. appl. Diff. I, p. II 3, so-
litarium gentianam, tantillo nucis vomicæ sociatam, olim
haud parum, certe æquivalens, aut constantius quid, quam
nunc cariorem Chinam chinæ, præstitisse, ejusque extra-
ctum isti, quod ex zedoaria, & modo nominato cortice
paratur, æquipollere scribit: sed ob horrendum, ut vocat,

saporem rarius ipsam ab eo in usum vocatam esse videtur. Commodior igitur, pro delicatioribus, pilularum forma erit; quarum duas ex Hermannil. c. apponemus: Rec. Pulv. gentian. ʒʒ, sal. absinth. gr. 15, in robustis ʒj, F. Pilulæ, auri folio involvendæ. Rec. gent. serpent. Virg. cort. chin. a ʒʒ, sal. prunell. ʒʒ vel gr. 15, m. f. Pulv. vel redig. dicto modo in pilulas, quas Autor omnibus intermittentibus febribus convenientes sistit, iisque infusum, ex rad. gentian. ʒiiij, serpent. Virg. ʒʒ, cort. chin. ʒiiij, fl. cent. min. pj, piper. long. ʒʒ, cum vino parandum, & in alvi adstrictione, jalap. fol. senn. rad. helleb. n. & passulis exacin. augendum, addit.

§ 26.

Quamvis pectoris affectibus vulgo dulcia destinantur, amara tamen sua utilitate in iisdem minime carerent, ut scil. resolvant, putredinem corrigant, simulque roborent, inter alia, myrrha, veronica, scordium, trifol. aquat. nostraque gentiana probant, in infuso vel electuario; additis, pro renata, saporem gratiores reddentibus. Haud levem qq. ictერი, aut hepatis & lienis obstructionibus subiecti, opem a talibus, junctisque rhabarbarinis, cichoraceis, ebulinis, helleborinis &c. sibi polliceri, instantemque ex cachexia hydropem avertere possunt.

§ 27.

Quod ventriculo saluberrima sit, ex antecedentibus cognovimus. Theodorus componit pulverem ex gentianæ, zingiberis, calami arom. liquiritiæ ana ʒʒ, sem. anis. fœnic. coriandr. ana ʒij, coryophyll. ʒj, quibus, pro lubitu,

tu, etiam piper addi potest. Quid Tragus de ejusmodi medicamentis sentiat, ita exponit, l. c. Der gemein Man weiß kein bessern Tiriack oder magen-arknei/ als eben den Entian. Den was sie innerlichs Prestens in Leib und Magen fühlen/ vertreiben sie mit Entian/ Calmus oder mit Ingwer/ und geracht etwan solche Arzney daß/ dann hetten sie die ganz Apo- thek mit iren Sophistischen und Arabischen Pilulen eingeschlunden.

§ 28.

Vermibus inimica est, non, ut communis fert opinio, propter solam *amaritiam*: cum hanc non omnes respuere, colocynthidis poma, ab illis erosa, & bilis brutorum atque hominum saepe verminosa evincunt: cum contra ea insipidum & vivum, ac tantum dulcem, sulphurque commune ferre nequeant, & Hermannus, l. c. p. 55, pulverem gentianæ cum dulci saccharo saturni misceat, eumque in aqua graminis, manifesto sapore carente, ititemque hisce insectis adversa habita, propinet. Delicioribus sola aqua, ex tota herba destillata, sufficit, si cataplasma, ex cocta radice ventri imponitur.

§ 29.

Quod utero conducat, dudum ex allatis innotuit, Movet enim menses, lochia, & foetum mortuum; matricalesque suffocationes sedat. Sive vinum, cum ea digestum, sive spissus succus, in ∇ artemisiæ solutus, bibatur, sive radix recens, aut emollita per aquam, in pessi forma adhi-

adhibeatur, aut, ejus loco linteum convolutum, succoque expresso, vel decocto imprægnatum, in genitalia recondatur.

§ 30.

Præter hæc, usus ejus ad externos affectus amplissimus est, quandoquidem Dioscorides succum *oculis inflammatis illini*, & *acribus collyriis* misceri scribit: ibi quidem, ut nobis videtur, non in statu, sed in declinatione; hic vero, ubi vel cuticula, unguis dicta, consumenda est, vel fordes abstergendæ sunt, visui obicem ponentes. Spectat huc historia 185 Reusneri, a Velichio edita, curatæ cæcitatæ, quam totam adscribam: *Puer integro anno cæcus, quod oculi sordida quadam crusta obducti essent. Multorum opera usus, curari non potuit. Tandem accedens quidam, radicem gentianæ coquebat in vino, ad cons. med. & oculis decoctum siphunculo injiciebat, per 3 vel 4 dies, mane. Mordebat quidem valde, sed puer convaluit.*

§ 31.

Vulneribus nonnulli Chirurgi solam herbam contusam, aut expressum succum applicant, ulceribus autem pulverem inspergunt. Tolluntur hac ratione impedimenta sanationis, *putredo* scil. nimia, substantias læsas resolvens, & *luxurians caro*, consolidationem prohibens. Qui malignitatem aut venenum suspicantur, admiscunt theriacam; haud omnino bono consilio: cum mel, & alia ejus ingredientia externe actionem gentianæ remorentur, quæ,
sibi

sibi relicta, non minus efficax, quam scordium erit, cujus pulvere solo Guttmannum bubones pestilentes ruptos, & alia maligna ulcera sanasse, Reusneri obs. 133 nos certiores facit.

§ 32.

Quid in fonticulis repurgandis & ad justam humiditatis largitionem sollicitandis, globuli, ex radice parati, possint, neminem latere putamus. Ulceribus cuniculosis succum mederi, ex Dioscoride discimus, quibus ope syringæ infunditur. Si vero ex arida radice turundæ fistulis induntur, (quod Dioscoridem participio ἐπιτιθεμένην innuisse, suspicatur Cornarius,) tunc, verbis Hermannii, l. c. *laxior illarum substantia, a susceptis humoribus intumescens, has sensim dilatat, & sal acre callum exedit.* Per hanc salis acrimoniam succus vitia cutis, ex quibus Dioscorides solas vitiliginis nominat, tollit, sed lentigines etiam, ipsamque scabiem siccam corrigit.

§ 33.

Qui liquori, ex herba & radice, cum aqua simplici vesicæ cupreæ inclusis, exstillanti æquales toti plantæ vires adscribunt, falluntur: cum nimis fixa ejus elementa sint, quam ut hac via in sublime agi queant, & proinde exigua pars salina, per ignem resoluta, aquam levi sapore inficiat, ut teneriora saltem subjecta inde alterentur: talia scil. quæ ex levi causa ægrotantia, per blandissima quoque medicamenta restituuntur: imo per probatissima ista Hippo-
D cratica

cratica remedia, *quietem*, puta, atque *abstinentiam*, adeoque per solam *expectationem* convalescunt. Ut proinde, quando Matthiolus, l. c. sæpius se expertum esse, *febres, ab infarctu tam viscerum, quam vasorum*, excitatas, per aquam, ex vitreis organis & *vaporis balneum* destillatam, *mirifice* tolli, scribit, mera miracula illis narrare videatur, qui norunt, quam segniter ejusmodi calor aquam & fixa rerum principia elevet, quæ in vesica bullientia ascendere nolunt. Quando autem generosum vinum, loco aquæ, a Theodoro adhibetur, tunc plures equidem salinæ atque sulphureæ moleculæ alembicum transcendunt, quæ tamen nullo modo vires integri concreti assequuntur. Id quod etiam de liquamine, per descensum inde expulso, ipsaque essentia, per V parata, judicandum est.

§ 34.

Quamvis enim hæc & extractum, inde, per abstractionem menstrui, resultans, amarissima sint, & sola pariter, ac cum aliis combinata, in plerisque hætenus enumeratis morbis manifestum usum præstent, vix tamen credibile est, teneriores sulphureas, & quasdam salinas, cum hisce in poros V receptas, omne illud præstituras esse, quod Aëæ, & salinæ fixiores, una cum terreis, ejusmodi menstruo non æque obtemperantes, ideoque in capite mortuo relictæ, effecissent, si cum subtilioribus simul in radice permanissent. Longius adhuc a naturæ scopo recedunt, qui per *fermentationem, destillationem ex retorta, & calcinationem* liquores acres, foetentes, oleumque empyreumaticum, & sal alcali inde extorquent: cum talia
nova

nova entia, (quorsum etiam æthereum oleum, si ejus quip-
 piam cum aqua ex vesica prodierit, pertinebit) virtutibus
 quidem minime careant, hisque atque illis affectibus, a
 radice expugnari solitis, frontem obvertant; ita tamen
 comparata sint, ut iisdem carere possimus: cum nec omni-
 bus indicationibus, nec eadem ratione, qua gentianæ ra-
 dix in *pulvere, electuario, pilulis, infuso, decocto &c.*
 hactenus consuevit, satis faciant.

D. S. L. H. E. G.



